

出使美日秘國日記

出使美日祕崔日記

光緒十七年正月初一日 元吉

黎明率隨員等朝賀行三跪九叩禮晨設麪午後設醺 外部副
外部英公使等送行道新喜 美外部總辦送到外部護照一紙
信四封分致箇龍巴拿馬嘉里約三領事又致美國駐祕公使是
晚亥初上火車亥正開車卯正到紐約陸永泉及巡捕來照料遂
赴領事署

初二日晴

領事沈桓偕商董三人在署內相迓辰正早饌遂謁凡吳客脫及
律師鍾式又至滙豐撥規銀壹萬兩交沈桓代收備用午初上船

同行者黎榮耀陸永泉凌善成武弁劉賢侯諫又洋僕阿齋小榮已送至船而因有病不能去遂聽其回午正開船船名紐乎薄容二千七百噸客房不如大西洋輪船之寬而搭客亦寡所帶隨員人等盡附上等艙位均在船面行頗穩

初三日晴夜雨

夜看北斗其柄極下一星離地如全斗尺寸因此行直向南將來到祕魯時只見南斗而北斗全入地故詳誌之每日約行八百里至九百餘里天氣驟熱本船主爲美國人談及美水師部近飭船廠造鋼甲船三艘除軍械外每船價值不得過美銀四百萬圓各載重八千五百噸船身吃水二十四英尺共行海里至少須每半

時十五里煤艙可裝煤四百噸鋼甲厚十八英寸駕駛之口徑十八英寸並八英寸者各四尊又六英寸口徑者四尊造船之一釘一木皆須用美國所產不得借材異國云 因謹按美之富足如此而其造船不准借材異國防銀錢之流入外國也中國雖開船廠軍械局而仍不免向外洋購買以銀易鐵長此安窮謀國者所當急籌善法也

初四日晴

斗柄極下一星離地也如斗杓之上三星離第二星蓋漸近地球矣 報言俄人議造西伯利亞鐵路謂有三利一則以俄之東境輪船可通一旦疆場有事敵國以兵船封口則糧必盡有鐵路則

糧可通二則中俄有釐可以運兵實邊三則內地之貨可以出運
化無用爲有用合計其費需六百兆羅卜議分三段由國家專辦
云

初五日晴

斗柄下一星已入地但見第二星矣天氣漸熱不能著棉 此地
有小島八處詢諸船主則島上皆黑人共三千餘名口最大之島
有八百人島人無所事事曬鹽而已以鹽易麪爲食暇則眠客船
有泊此者則盜之美國設一領事以鎮撫之防他國之佔踞也
因謹按歐墨各大國思深慮遠其心周於本境之外與百數十年
之後此區區小島耳而爲他國得之則可以屯兵修船添煤儲水

爲兵船之接濟卽足爲我之患設官以鎮撫之耳目遠矣他國自默消覬覦也

初六日晴

斗柄三星均入地天熱夾衣亦不能著但著單衣風浪漸大舟行向左右而側 聞俄國兵部定於今年爲始在琿春一帶增守兵一隊中俄方睦而於交界地方增兵是何故耶 是日美總統臨議院謂美國與外國邦交頗形輯睦國中亦物阜民康國用甚足且自增加關稅以後洋貨少進土貨暢銷於國計民生更大有裨益卽於他國亦無有大損云云 因謹按美國加稅則而墨西哥國亦加美國入口之畜稅美商苦之德國已約歐洲各國加美稅

以相報英法亦不以爲然安得謂與他國無損也至云加稅以後洋貨少進於國計民生有裨益則誠然矣

初七日晴

斗杓第二星入地自本日以後如中國六七月天氣風浪尤大

同舟美人言歐洲之電綫通至錫蘭已增成雙綫又自印度至中國越南新金山小呂宋新加坡修補電桿電綫以期一律整齊共費銀四百餘萬云 德國民人不忘前相畢思麻曾擬集鉅銀爲造一留名閣畢相讓美前王謂前王功德之大尙未有此臣何敢先君嗣爲德國前王已立留名閣因念魚水君臣非是君不能用是臣非是臣不能相是君畢相勳業自在人心而無一碑一石傳

諸永久德人引爲憾事今再集德銀七十五萬二千七百五十三
馬克爲之立一通國去思碑德人之不忘畢相者皆以得與相爲
榮畢相之名與國同休矣 德國前此試槍之時有人名格魯森
其所造快槍一分時能出五十彈 德國前相畢思麻致仕以來
民不忘其功又爲擇地於浮別森構一華屋以處之 因謹按德
相畢思麻今年七十三歲前此破奧國滅法國其功甚偉布魯士
無此人國幾亡矣爲之立碑築室此人心之公也

初八日雨

北斗全入地不見未刻到个郎天氣大熱單衣汗出个郎總督來
見美國駐个郎領事亦來見領事爲因言曰我乃中國之領事耳

以其專保護華人也遂往答拜華人之貿易於此者多放爆竹相迎亦有升旗於門首者商董易佐才會慶已來迎巴拿馬美領事阿丹信來電詢赴巴拿馬之時刻屬卽電復遂電覆以明日辰初初九日晴

卯正料理行李點心後上車美國駐个郎領事來送行并贈鮮花一握曾易二商董同行火車公司云奉阿丹信之命以專車來迎送至巴拿馬途中均黑人卽土人也粵人之設店鋪者甚多聞自巴拿馬大工停後生計不如前矣已正至巴拿馬阿丹信已來迎因以外部書與之阿丹信遂送到嘉蘭軒客棧棧尙宏敞棧價因每日十圓餘人每日五圓遂造阿丹信宅并送湖縐一疋磁瓶一

對茶一箱金扇二柄阿丹信之夫人出見甚喜云華人甚安分我等必保護令其安業因謝之南亞墨利加洲分割數國英國居其大半其土著自守之地不過十分中之三四因謹按墨洲之地與中國相爲底面蓋人之立於地者足與足相抵也南墨洲又在赤道之南中國明以前之談天文者均云南望赤道近日極熱至此卽無人矣而不知赤道之南其氣候與北同且極南尙有南冰洋也然則天地之大也前此只測得一半耳

初十日晴

阿丹信來言本省總督願一見邀往謁之至門有兵士擎槍而逐入門上樓總督出見參贊繙譯爲傳言因亦道願見之忱且以華

人相託該總督充必保護坐久阿丹信言曰貴公使尙有何言可
以面屬因向該總督言曰美國一百年前草昧初開各埠冷淡一
百年後日盛月新如此之速者因鐵路各廠華人爲之經營也今
貴國指可崙比亞既有華人接踵而來則興旺可立而待敢爲預
賀至於華人之業於此者有貴總督之庇蔭有貴領事之保護本
大臣可以放心夫復何言惟有以華人相託而已該總督大笑以
手拍胸力任保護因謝之遂偕阿丹信遊覽舊蹟又至阿丹信宅
辭行並送商董龍旗聯扇藥材茶葉各物商董亦報以磁瓶一對
絲巾一盒因辭不受黎榮耀以爲可轉以送總督允之遂送總督
處總督受之又言俄國兵艦之在太平洋者現擬不用英煤因

俄國近日覓得煤礦出煤甚多無須外求該國鄰近太平洋故知
之因謹按俄人之心計大抵遠交而近攻遠交故通問徧於東西
洋近攻故蠶食急於鄰國太平洋無屬地而兵艦亦周巡者則備
豫不虞而亦求諸習海綫也皆遠圖也

十一日 晴午刻上船

商董曾桂鵬易佐才美領事阿丹信均送至躉船商董以經手代
用之項列單交來計客棧之費每人每日五元因獨按日十元洗
浴啖茶點心犒賞尙在外也船價每人一百七十元伙食每人每
日一元遂上船船於明日午刻開阿丹信交來个郎赴紐約船期
單計每月三次西曆三月四號十六號二十四號均有船赴紐約

英人於緬甸測量道路擬造鐵軌達怒江以通雲南將以通商計三百英里估價須銀三百五十萬磅 因謹按俄人造鐵路於琿春則相偪於北法人造鐵路於越南英人造鐵路於緬甸則相偪於南數十年後中國邊防其急乎

十二日晴未刻開船

舟望東行行一時卽指南而行此海海鯨至多時浮水面因望之以爲長二丈餘船主曰其長實有五丈也離船數十里海鯨矯首向海面噴水其高四五丈如煙如霧又如海船之挂帆時隱時現亦可知其身大而力巨矣 舟中英人言阿富汗與俄立約因查阿富汗在印度東北北與俄鄰故英國以阿富汗爲印度屏蔽今

俄與阿立約將由陸路通商以至阿京則印度藩籬已撤英人將何以保印度俄之覬覦他國土地無時不思侵佔其性然也

十三日晴此數日中波平似鏡舟行砥平

俄太子奉俄皇之命親帶兵艦四艘由歐洲展輪遊新金山新加坡西貢以至中國各通商口岸以廣見識冬初當可抵滬矣 因

謹按歐洲各國之君及其世子多爲遊歷既廣聞見且習風波揆諸古人習勞之義亦有合也 美國哈哇城天文館之大總裁擬

遣熟悉天文星象各員隨帶各色器具暨測探遠近之機器并遠鏡前往祕魯查探現聞該館總裁已選定深諳天文官員一人名畢刻林爲總辦帶同司員兩人一名寶格蘭斯一名唯卡斯以及

司事工役人等定於下次公司火輪附坐前往祕魯之阿立冠派城駐紮查阿城係居祕國之正中測觀星象一切最爲相宜且內有一山不高不卑山上建屋居住先將各色器具安排妥貼然後詳細逐探各色星象以及金火兩大星宿並聞此處測探月象暨用鏡拍照較他處尤爲詳明也畢君云現在南半天一切星象無論巨細較在北半天尤爲皎明並將所視天象逐一畫圖貼說以便編輯成書詳加校核也惟爲時須八年之久至速亦須六年方能蒞事西人之用心天象於此可見一斑云 因謹按美人測南墨洲之天文卽測南墨洲之地理也但測天文之經綫緯綫度數若干卽可以知地勢之道里若干不僅南半球之星宿可知也惜

祕魯無人不能知美國用心之深耳

十四日晴

此兩日內不見山間之船主今日午正舟過赤道午以後舟行赤道之南矣是夜船向西北折入懷紐而江 美國搜購現銀聞近日解往比利時國不知何用或卽爲比國代購也 義大利國所造最大之鐵艦名薩那者工已告竣其下水之時觀者如堵海部大臣亦在坐一時拍掌歡呼聲如雷動是船計長英尺四百十尺闊七十七尺容一萬三千八百六十噸洵足爲意大利兵船中之巨擘也 俄國欲於裏海地方推廣鐵路以達波斯之謀隴得城尙未謀於波王擬於動工時通知其事蓋早視波王爲無能不敢

不從也 因謹按俄與阿富汗立約矣又營鐵路以達波斯一則垂涎於中亞一則垂涎於歐洲也元世祖之時分遣大將奔彪愷撒略地歐洲乃地定而鞭長莫及依然分裂俄王豈不知乎而勤遠略乎

十五日晴

江行向西北已刻到惠愛磯地頗平敞背山臨水闊閭周密勝於巴拿馬土人約萬人華人居十之一蓋厄爪多國之所管轄也兩岸樹木青蔥可愛華人葉文英陳忠華高靜光來見言前此二年該地方官禁制華人賴英領事張百熙爲之代繕稟具呈請於國王得以弛禁遂得安業因教以宜卽聯絡英領事以資保護我

國未與該國立約不能以公法繩之也此地至香港輪船兩月可到帆船須五月華商約上岸因以開船甚速不便離船辭之

十六日晴已刻細雨遽止熱甚

抵薩拉埠 又名打拉埠前一年尙未設埠亦無人民山係童山無草木房屋約百餘家因詢船主以此地何產則出火油也自近年方知之因開井取油每年運往各國漸運漸遠船至此下機器爲取火油各廠之用也申正開船戌正至比打埠已入祕魯境矣自紐約至祕魯各埠房屋多以薄鐵爲瓦其凸凹如瓦式而以鐵爲之長約一丈寬六七尺取其質堅而價廉也墨洲築室其極大者以白石條砌成石條長盈丈厚數尺自基至頂一律非地震不能

壞如美國各部衙署間造費三千萬圓次者用磚又次者用板磚
板所作之屋多以鐵皮爲瓦閒有用鋼瓦者然不多觀 因謹按
一百年以前香港一荒洲耳二百年以前上海亦海盜出沒之地
耳迄今香港爲大埠廣廈雲連其地幾於計尺論銀可謂盛矣上
海爲我國第一市鎮其他皆不及焉所以然者其地近海而又爲
各國商賈貨物往來之孔道耳或謂地氣有盛衰而不知實由人
事也

十七日晴天寒稍涼清晨可著夾衣

辰刻泊打拉尾島亦童山而所下者多鐵瓦之類地產棉花風漸
大船行頗側 本日發南風而天氣轉涼初以爲異繼思此地已

在赤道之南則南冰洋在地之南此地之南風猶中國之北風也故涼 俄國與土耳其國交界之歐西魯姆地方俄兵至者日益多土耳其民人恐其進攻驚相走避土國家乃出兵以備之 美國上下議院議員羣請於總統商之英國並商之墨西哥國禁自英之屬地加那大與自墨西哥入境之華人 因按美自光緒十四年禁工之例行可謂嚴且酷矣新華工已不准來卽舊者亦不准來并領有美國之照許其來者亦不准來自以爲至密矣而邊境甌脫之地華人乃偷越而來華人固無恥而亦美之背約失信有以激之也

十八日晴

至阿村島亦童山而其內出煤土人造鐵路火車以運出口船至此稍泊以載煤備用已刻仍開行稍向東南不似前此之直向南矣東南面多山皆童山也

十九日晴

未刻至白鴿尾裝米四百餘包牛百餘隻中正開船 俄廷密諭稅關於英國入口鐵器棉紗加增稅則較之舊稅多至自之三十至百之四十又擬廢勃而忌里亞之君以瑞典國之世子代之因謹按英國棉紗行於中國者日廣似可做俄國而增其稅亦奉一漏卮而增一入欵也

二十日晴

卯正泊打辣美卸米百餘包及木箱數十已初開船此地山甚深
望之有四五層其第四層在雲外雲環山腰如帶山尖出雲之上
要皆童山全無草木而多沙舟過產鳥糞之山同舟英人亦赴利
馬與因接談言至祕魯已二十五年矣今將辦鐵路也又言祕魯
沿海之山荒秃無草木而內地美不勝收惜祕邦無政不能經理
也十年前亦曾至中國中國民風勤儉萬不能與其民爭利惟擁
貲厚者操其利權則得其利不若祕魯之利之易爭也其地荒則
地利易與其民寡則客民可容其俗懶則土民之利可奪故舍中
國而赴祕今擁貲過十萬置田宅之外尙有餘款以逐什一若鐵
路歸英則利益溥矣云云 此地祕國各寮至多華人之所聚也

華人上船來見言三年前有委員二人來查察一切供張均由商具而於弊政究未詳查華工依然困苦會已呈控於出使大臣矣因於光緒十五年由滬出洋之先卽有香港商人書控告委員查察之不力今又聞之商人共察之難查欺抑人不易得也

二十一日晴

舟行黑水洋東面仍多山而無風浪計自元口至今日舟行已兩旬矣雖不眩暈而頗覺勞頓蓋山顛簸顛搖無一日之息也屈指今日午刻當可抵嘉里約已正抵埠叅贊吳濬領事張曾詔繙譯黎煒洋員杜嘉爾來送當坐小輪船上岸抵火車廠華商亦來送遂共雇專車至利馬都城

二十二日晴

謁外部訂遞

國書日期商定二十五日 智利國內亂華人之寓智利者因求英公使轉致駐智利之英公使代爲保護 因查智利國勢已近南水洋蓋與俄之鄰北水洋者遙遙相對矣自勝祕魯後頗有夜郎自大之意前此與祕魯交關致損華人產業鄭使曾託美國駐智公使索賠不得今乃國中自亂其將衰乎

二十三日晴

華商二十餘人於嘉里約相迎又至使館相見今日回謁遂至通惠總局小坐局不宏敞而尙修潔華商二十餘人相見因詢以現

在利馬華人數目答云不能詳知遂屬其查明又詢近年華人較之前五年爲增爲減答云近來出口多於進口大約已減於從前矣又云中西學堂何以無人就學則云中華四子書少時無不讀者父兄自可教其子弟淹博之道非所敢期故不須就學洋文須延洋師費用太大無可籌措請卽停辦因再三開導衆云勉強允從非心所願豈能持久不如直言前此本非所願故一年以後卽已解體今決不敢應承因察其情真無可再言遂止卽登車回館二十四日晴

祕國舊總統偕其子又參贊某又前駐中國公使愛立謨來見華商李杰彭某王某來見當屬其查明現在華人之在祕魯都城及

各寮共若干人 聞智利國之水師統領因其總統欲改爲君政之國激變連日交仗已攻取兩口岸矣 德員在阿非利洲現以重貨僱土人爲導以期入其內地蓋欲闢其土地且冀相安無事也 德奧兩國近來私訂密約彼此嚴爲防堵有事則唇齒相依無事則時時訓練 因謹按歐洲各國分裂阿洲後葡人日人未聞有所經營若英若德若法固各有布置矣春秋時吳與晉爭盟於黃池而於越以兵入其國故德方圖阿洲之地而又合奧以防俄

二十五日晴

祕都利馬自古至今終年無雨天時地氣殊不可測是日未刻細

雨如塵地不能溼參贊吳濬以爲少見 英國於給迫考老尼在
阿非利加洲之南開闢內外政治日益修明惟費用亦增幸鐵路
漸拓商務漸興進款亦漸旺尙可支持國有人焉宜土地之日廣
也 因謹按言之足以徵信者甚難諸子百家龐雜無論矣嘗讀
爾雅原文云東至日所出西至日所入者此何地耶日本不動安
有所出入耶由中國向東而行過大東洋再過大西洋由歐洲而
返中國矣無日出之地也由中國向西而行過歐洲涉大西洋逾
墨洲再涉大東洋由日本而返中國矣無日入之地也且中國之
日出卽美國之日入美國之日出卽中國之日入隨地球之向背
爲隱現非真有出入之區也原文又云距齊州以南戴日爲丹穴

北戴斗極爲空峒一若北有斗極而南則無也者一若南至日所行之赤道而盡也者皆非也南斗七星因於此固明明見之矣戴日之地爲赤道因固明明過之矣至於周髀算經一謂月之大徑一千餘里後世又謂日之大稍過於地皆未得千百分之一也無輕信古人也

二十六日晴

是日爲選

國書之期午刻兵頭五人帶樂工軍士九十人建祕魯國繡旗來迎

國書既至使館則立旗大廳之西樂工以時作樂申初護衛大臣

副外部二人到宮車二輛亦到署敘寒暄卽偕參贊吳濬繙譯黎
熯署參贊黎榮耀洋員杜嘉爾乘宮車至總統宮門門已列仗相
迎騎兵執旗擎槍嚴陣於門內右偏因下車率各員入宮總統已
率各部大臣鵠立以待因趨而前捧

國書行一鞠躬禮卽遞

國書總統接受因出懷中頌辭紙朗誦之總統亦讀頌辭讀畢又
遞報賀

大婚之書禮成總統延因坐參贊等員各部大臣亦坐總統詢我
皇太后

皇上聖安因敬立以對又作寒暄語遂退出乘宮車回使館騎兵

執旗擎槍前導後擁既至館外部卽奉總統命來謝因均款以酒食又賞樂工軍士以酒共去也再賞以銀錢外部等乃辭退因卽乘車至外部處謝步並謁各部大臣

二十七日晴

謁各國使臣並回拜舊總統 英人議禁鴉片煙會中人有自印度遊歷而回者謂印度煙館幾一萬家吸煙者多消瘦現在發出之帖准開煙館者計一萬九千三百九十五張所願政府從此卽停無壞心術也 俄主諭兵部大臣明年琿春應添步兵一營以爲西比里亞以東之策應 因謹按琿春爲中國之地中國駐有防兵俄人營鐵路以達琿春又添兵隊鐵路成而邊事亟矣

二十八日晴

謁副外部前駐中國公使並房東遂送外部副外部英公使美公使房東禮共五分 可崙比亞玻璃斐威內薩巴西智利各公使來見祕將軍佳拿旺那來見其人曉暢兵機精力強壯將來前程未可量也 英人擬通商於中國之雲南省謂法人已居蒙自增產業開利源英人豈坐視不由緬甸以達雲南且緬甸與中國本可通道若築鐵路將來商務必盛云 因謹按歐洲各國大小相維犬牙相錯無可開拓故皆垂涎於阿洲可唾手而得矣中國之地北與俄鄰南與英法鄰東與日本鄰俄人侵佔於琿春黑龍江之間英法已踞有緬甸越南之地而其欲未發也日本已縣琉球

未嘗一日忘高麗而其志不能逞當此時勢不特邊防難固卽邊界亦難清矣

二十九日晴

英公使美代辦德公使來見因詢德相畢思麻近狀言已告退又詢德將軍毛奇特起居言尙爲將軍年已九十矣因言此二人者德之柱石也德公使亦詢李鴻起居因言尙居相位德公使言外國聞李鴻之名與畢思麻相等因謙讓又謝英公使代爲保護寓居智利之華人英公使謙讓遂各退英人在緬甸自曼得來至怒江測量道路以備設鐵軌者途中多遇險阻有一處最險者須駕長橋三五十丈始可免縋鑿之費鐵路之成尙需時日今

擬先山磨地通至猛剛以至於排麻費省故也 因謹按緬甸越南兩小國中國列爲荒服以羈縻勿絕待之兩國亦僻陋自安無所振作自爲英法所滅而講求商務建置鐵路訂立稅則時有所聞豈天時地氣之變遷歟抑闢草萊任土地固存乎其人也因願施之於東三省焉

二月初一日 元吉晴

西班牙公使來見 祕魯國境北界厄瓜多國可審比亞國南界智利東界巴西玻璃委國西界太平洋海居民二百六十三萬一千餘生番二十五萬餘外國工商七萬八千餘內中國六萬餘人義國七千人法國二千餘人日國一千六百餘人德國一千六百

餘人英國與國瑞士葡萄牙美國人數甚少地產糖硝泥自光緒六年與智利搆兵敗北割地所產硝泥之地盡歸智利遂至無物不稅無人不稅而苛政多矣土耳其之摩洛哥城百姓倡亂官軍與戰敗北急請援兵土君聞之深以爲憂因按土耳其版圖尙跨三洲地非小也乃以君臣玩愒國無靖時前此俄人伐之非英相助已滅亡矣

初二日晴

祕國都城名利馬居民十萬一千餘人人多入耶穌教其國爲民主之國其主持政治者有三一爲上下議院山民公舉國中無論何事必待議准方可施行總統亦歸其議舉一爲總統統領全國

之兵頒行議院律令之權設部臣五曰吏部以治官及工曰刑部以治各堂各局曰戶部以治商曰兵部以治水陸軍曰外部以治交涉一爲審案官如中國之刑部臬司由議院公舉其人必由律師出身以治訟事曲直是非由其斷決 玻璃委通商公使及寮東來見勉以厚待華人寮東極言無有不厚 美兵船至中國煙臺報中國南北洋兵艦共十二艘已展輪出口往各處巡歷此去年八月事也又云中國兵艦將至朝鮮 因按泰西各國留心時事凡交涉各國之舉動時時留心而於軍務尤留心焉

初三日晴

考祕國水師兵船三艘不過容三四百噸陸軍四千分爲步兵六

旗馬兵三旗大職兵二旗另有守街巡兵三千三百七十一名有馬者八百四十三名總計共七千三百七十一名 祕國口岸極多以嘉里約爲最大距利馬二十里來往火車路二條大馬路一條土民三萬四千餘人另有小口岸十九處衣路一口已歸智利管轄 巴西國公使來見 謁祕外部 祕報載英國君以金鏢送中國

皇帝其鏢上刊中國文中外和好昇平之兆 因於此不禁欣悅 美國自增關稅以來物價騰貴百姓患之謂此乃無異於加捐病孰甚焉其西方之民尤多不服皆欲國家改此稅則以爲民使德奧意三國同盟雖不專防俄國實有防俄之意俄人知其同盟

之局久而益堅奧更有大憾於俄俄亦先事防維 英法二國以
英國屬地紐芳蘭地方漁事所有爭端久而未決法國乃請教王
從中剖斷教王允之 因謹按此亦排難解紛之一法化有事爲
無事也

初四日晴

秘魯全國分爲三十省九十四府計大市鎮六十五縣七百五十
七大鄉落一千三百三十九中鄉落四百七十小鄉落六千一百
七十田寮四千五百西方一帶土地肥美故多田寮東方多高山
山常出火其出產以糖爲大宗 謁外部及各國公使辭行也

美國海部議添礮臺船三艘其一造於舊金山需銀三百二十四

萬其二造於費城需銀五百七十八萬又造極快巡船一艘需銀二百七十二萬五千元 因謹按自紐阿連之案出而義有責言自祕林海之案出而英有責言美之布置海防所以如此其急也然非其國帑之充則經費不足而束手非其船廠之多則製造無地而束手要在綢繆於未雨而後可指揮於臨時耳

初五日晴

祕魯鐵路共二十條合計共本一萬三千餘萬兩間有歸智利者其商船皆英國智利國所造利權盡歸他國矣 外部來見愛立謨威內薩公使兵部大臣均來見 英德兩國立約以北海中希立古蘭島歸於德俄人以爲此島爲德所有則俄國波羅的海之

水師大有不便惟是英德之交甚固一旦有事同心相助則計之得者也 因謹按希立古蘭北海之小島也英德與俄歐洲之大國也德非爲阿洲之地斷不肯讓與英英非得此島斷不容德踞阿洲之地俄處局外亦有妒心抑何視土地之重耶

初六日晴

祕魯進款以祕魯銀計入口稅四百餘萬出口稅三萬餘買賣產業稅十九萬餘火酒至玻璃委稅三萬九千餘國內火酒釐二十五萬餘關稅租十五萬餘進口船稅四萬餘房租二萬餘鑄銀局進項九萬餘屋稅十二萬餘稅關罰款十四萬餘身稅十七萬餘出家人身稅二千三百餘各款碎項一萬餘書信局進項十五萬

餘沽有印紙銀五萬餘又九萬餘 訟稟用此紙係具呈及立合同
用船局進項三萬餘火車進項八十四萬餘鹹泥稅八百餘礦稅
八萬餘磨煙度口岸馬頭進項二萬四千餘進口貨投關紙八百
餘新例加抽各貨出入件頭二十三萬餘嘉里約馬頭進項三萬
餘紙牌釐一千九百餘鴉片煙進口稅二十三萬餘稅關紙項五
萬四千餘 此紙係入關稅貨用生意稅十四萬餘鑄銀稅 每百三
元九千餘田寮稅五萬餘鹽埠進項四萬餘巡丁進項六萬餘煙
釐二於九萬餘各口岸馬頭進項一百零三萬餘大監房工一萬
四千餘電綫二萬二千餘加抽買賣單二萬九千餘統共全國進
項九百一十萬八千九百五十一元八角三仙 國債貸款及欠

太平糧銀二十七兆八十萬元廢銀紙銀七十九兆元前任總統卑路拿手所出新英架銀紙九兆五十四萬一千元而借他國之款尙不在內 西歷一千八百八十九年日本出口之絲較上年多十一萬四千三百五十磅多售值英金五萬三千八十四磅以絲巾而言之在一千八百八十八年已較一千八百八十七年出口多售值英金三萬一千一百七十一磅者至一千八百八十九年又較一千八百八十八年多售值英金十一萬一千四百十四磅是幾多百分之五十其他出口之綢綾亦復較前大盛在一千八百八十九年值英金十九萬三千五百七十二磅較一千八百八十八年多英金十四萬五千五百六十二磅絲市之盛不可見

乎日本於一千八百八十九年出口之茶值英金九十五萬八千七百六十九磅在一千八百八十八年僅值英金九十四萬四千二百二十五磅蓋較多英金一萬四千五百四十四磅云 因謹按祕爲小國民數二兆有零合中國二百分之一入欸銀六百餘萬兩合中國十四分之一爲詳稽其入欸則書信局十五萬餘鑄銀局九萬餘鴉片稅二十三萬餘卽此三項以民數二百倍乘之合九千餘萬矣彼稅固極重而中國之稅未免太輕也

初七日晴

拜發行抵祕國并呈遞 國書摺寫船票火車票 英公使法代辦美代辦均來送行 是晚吳濬張曾詔爲具膳以明日卽啟行

也 祕魯國債均貸於外國由本國之民不相信也共計一百六十四兆七十六萬五千元合中國銀一萬六千四百萬兩計至西歷一千八百七十五年七月初一日止共欠息銀九十七兆三十五萬零九百四十元共欠本息二百六十二兆十一萬五千九百四十元合中國銀二萬萬餘兩此債由去年與債主訂定立約將國中火車鐵路交與債主辦六十年再由戶部按年籌英金八萬磅湊足計三十年爲止則所欠之債作爲清還 俄國以美國新增進口稅其自唐江出口之南省羊毛竟不銷售先是俄國各貨運至美國紐約者不少今以美國稅關多方留難運往之貨一時難起故無人肯運以往云 因謹按國債之舉利溥公私國家得

民有餘之資以集事而民亦可藏富於國此兩益也祕國不見信於民而貸於他國至以利權授人則國燹而民亦困是之謂兩損可以爲鑒

初八日晴

是日寅初卽起上樓瞻南斗見上三星下四星如北斗之杓頗爲明白牽牛星已入地 辰初各員均起遂飯飯後乘馬車入火車廠副外部及前駐中國公使愛立謨均到愛立謨言總統以因爲善辭令贈一照相愛立謨亦贈一照相因託以保護華人均點首談逾時威內薩公使亦到各國公使到者甚多不能悉記火車開時均送至車傍作別而去巳正至嘉里約遂上船船名不實樂船

主升中國旗申初開行

初九日晴

舟至打辣尾華商來見云此埠華人約四千人 聞美國與巴西已立報施條約美國所產之五穀麥粉乾羊鹹肉鹹魚乾魚農具開礦器具製造器具格物書契火輪車器等物巴廷允准入口免稅此外牛乳油餅火膠棉布鋼鐵器另計木器馬車樹膠則納半稅巴西所產之糖加非茶葉生牛皮等物運入美國亦免稅云 因按美國如此之富而筭算如此之嚴其意不過防利源之奪於他人而已其五穀麥粉之運入他國欲其免稅必有免他國之稅則以相報施則他國亦防利源之爲所奪也現在美國之麥粉運

入中國者每年數十萬桶皆不納稅而中國之米運入美國曾不免稅且加重焉報施之謂何

初十日 夜雨

舟至白鵠尾華商來見言此埠華人約六千近因到者日希土人尙不妨忌又言各埠所銷售多中國青縐紗襪及絲巾又洋人亦好服中國之山東紬取其堅而質也所見洋人多有服之者 同舟法國水師提督調赴墨西哥換班因與接談法提督言以前駐紮上海十二年極喜中國民情之勤儉中國水師海軍振興當有起色因言中國向來以柔遠爲心不恃兵力故不願以海軍角力今風氣既開自當整頓以飭戎行亦權宜之道也地球海軍自以

英法兩國爲冠其次則德俄義奧均有可觀法提督曰論鐵甲之多自然推英論海軍之強法實不讓蓋以法國兵艦管駕得人運掉靈便爭雄海面自以爲尙勝一籌因不便直折但答曰此誠聞所未聞具見貴提督之曉暢軍務該提督欣然而散因按近年查考各國兵艦英之鐵艦一百六十六艘法僅六十二艘不但大小不相等卽多寡亦相懸且去年法國議員詳查歐洲各國水師強弱情形而自知不得法見於報者屢矣乃特意氣而爲虛詞以囑喝中國以爲中國不知其底細而不知因已見其肺肝矣於此知法國之霸氣而歐洲人情莫能相下亦見一斑此因所以志切自強也

十一日雨

至阿村島船上上下下之人亦甚多貨物亦多天氣之熱至於單衣汗浹因將過赤道而日正當頂也 美國加利寬尼省下議院議定限制華人條例以爲可行者四十九人以爲不可者五人其例凡華人現寓居該省者按名給發執照以後不准續來上議院已議准矣 東洋日字報云聞和德兩國新訂密約欲互相保護以得唇齒相依之助若彼此與法國相戰兩國均須協力同心云 日本朝廷擬遣兵船一艘駛往北方之寄喜買海以便禁止他國漁船捕捉海獺及各種海貨查此舉亦效美國之禁祕林海捕海龍事 因謹按日本當中國李唐時事事步趨中國近則步趨英

法今乃步趨美國矣西人謂其情性如猴好效法人而輕舉妄動也可謂雅謔

十二日晴

至惠愛基此埠已在海峽之內實爲長江人之上下最多又有盜物者爲候測所獲並獲其贓送交船主船主以爲應由地方官辦理無可交者釋之是夜該船上貨下貨極多至開五門一時并力交卯初始畢辰初開行同舟有三十人須由巴拿馬赴紐約恐船行遲而大西洋赴紐約之船先開則大費事相與籌商告之船主凡行船諸人自司機器及司爐以下均給重賞令其上緊一面仍電致个郎輪船公司屬其停候一日當由該公司覆電允候十二

時辰 因查巴拿馬个郎爲煙瘴之地其水土最惡劣從前法人勒伯西集股開浚其地以通大西洋所招黑人歿於瘴者十之九行旅來往均視爲畏途焉以重賞速其行船使不致逗遛其地以染瘴病亦計之得者也

十三日晴

卯初開船出內江入大洋 同舟德國二員游歷墨洲人甚和藹彼此接談言德國來因河者與法交界之地也近有人於河旁置一生電機器卽藉河水以旋轉車輪有一萬匹馬力以生電氣然後通電綫於各製造廠之生力機器蓋用水力以生電又用電力以生力而運機器也其用至多如需火燭卽用以生光如需煅鍊

卽用之鎔化如需運載卽用以舉重推行惟所欲之無不如志較之用煤又爲潔淨計費資本僅二百餘萬圓而利鉅矣 因謹按電氣之利愈用愈擴近聞美國能以電氣表測鑛知鑛產之有無既省人力又省糜費格致之功也

十四日雨

舟行大洋時有大鯊浮水面大如栲栳所過數百里不可勝數英國屬地考倫比阿去年所漁海獺之皮有數萬張值英金四十餘萬磅其漁船二十餘艘漁人六千餘名若美國在彼處漁海獺之船僅有五艘所漁海獺不過數千德國之船僅有一艘所漁海獺不過數百 因謹按洋人重商而趨利英人尤甚故富甲於地

球中國向重農所謂貴菽粟而賤金玉也然而當漢盛時賈誼上書有云貴農夫農夫已貧賤矣賤商人商人已富貴矣意者天時人事之所趨自古已然不能執一而論乎考之近年戶部入欸每歲銀八千餘萬兩其中地丁銀只一千餘萬兩耳此外皆取諸商也若循古昔之關市無征則每年所入之數能數所出乎運本日新而法無不變敢以質之是古非今者

十五日晴

舟行大洋過赤道船主以午正用機器測天舟行至二十二度云十六日已正可到巴拿馬 義大利人言西歷一千八百九十年歐洲各國之朝教王者法義美奧德五國之民各有所獻美國居

多共銀十五萬餘兩然較往年已減矣 因查歐洲二十年前最重教王其權可以廢置各國之君共遣使在頭等公使之上自德滅法而法不能護教羅馬一城義遂收回教王惟餘一宮殿耳近日俄德美義諸國均不崇天主教美國之奉天主教者至不准舉總統教勢因此日衰然餘威猶存根株未盡尙有先已入其教者故不能無所獻也若法與奧則民心猶歸之而執政諸公實不以爲是矣

十六日晴

已正抵巴拿馬領事阿丹信已先至碼頭用小輪船載人及行李抵埠易佐才已到爲雇馬車五乘載人及行李赴火車廠阿丹信

則爲寫火車票並輪船票火車於申初三刻開行阿丹信亦坐火車送至半途因以路程太遠謙辭阿丹信遂返中途大雨抵个郎已戌初華商來迎代僱車送上船因自起爨船主已備飯從者七人均上等艙因按巴拿馬个郎地逼赤道天氣四時皆炎熱如溽暑寒帶之人至此極不相宜樹木叢雜芭蕉滿山四時不凋故開花而成實黃橘青梨波羅各果徧山均是尙有不知名者土人肌理黝黑形狀粗濁自成風俗非有鐵路火車不易經其地也火車行三時雖途中屢停以便上下之客然計程途曲折亦二三百里開河機器沿途布置廢而不川聞已費銀三千萬兩工程只三之一經費已竭故遂停也

十七日晴

廣昌商人請赴席因力辭隨員均往个郎總督來見美駐个郎領事來見言美駐中國中使田貝現已更換布列也接辦兩月之內可以啟行又言布列也爲北黨年五十五歲因又託以保護華人遂退 復謁个郎總督及美領事 昨夜至今日蕉果之入船者數百車以每車三百斤計蓋十餘萬斤均運至美國出售查此地周圍數百里人煙稀少山果至繁如無火車則不能運出山如無輪船則不能運至美蓋地氣既熱小車載重則壓而至碎又鬱而至腐閒有存者日久亦無不壞今以火車運出山既不積壓復以輪船運至他國又不久時可以銷售計一年之內所得已多此鐵

路輪船之利也 墨西哥國以美國新增進口稅其牲口不能出口議於進口之美國貨物亦重抽其稅云 因謹按交涉之道太柔則廢墨西哥小國耳與美毗連乃於美國之加稅而亦加稅以報之不畏美之詰責也亦不畏失美之歡也誠以不如是則無以持平亦無以自立也

十八日晴

此次駐祕時巴西公使來見詢我中國近興鐵路因答以甫有端倪巴西公使言伊國商民願興鐵路業經廷議允准但有約法三章須由朝廷核定一京城與各省城位置鐵路二與外國毗連之鐵路三保護國家之鐵路此三者均由國家作主其餘悉聽商人

相地辦理云云 英國可倫白地方有日本兵船水手結隊而行衣服鮮明自外觀之幾無異英國水師云 俄國以與各國預有成約有事之時不得添兵於黑海故欲於無事之時增添黑海水師爲有備無患之計今以所有鐵艦尙嫌其少卽欲添造鐵艦數艘并欲添造水雷船數艘 因謹按當今欲自強之國無不以興造鐵路爲先務則鐵路之利國無疑也俄增鐵船於黑海日本耀水師於可倫一求實濟一尙虛僞而海軍之當講求亦無疑也

十九日 晴中夜大雨

拜發山祕返美摺智利內亂據智國使臣言亂黨勢寡兵船不過數艘其餘地方安靖如常而商家之貿易於智者則云智國家有

輪船二隻載兵入衛其一已爲亂黨擄去其一爲兵船所迫幾不獲免幸而到埠而卑沙瓜一城業已失守沿海一帶口岸俱爲兵船所封其勢岌岌云 因謹按八年前智祕之戰祕魯鐵艦爲智利所擄而祕魯遂不支今智利自亂智國家之兵艦爲亂黨所有智國亦不支然則講求海軍其必以得人爲首務否則藉寇兵而資盜糧矣

二十日晴

舟至古巴島口岸外海面有似小鳥而結隊紛飛者因以爲鳬鷖之類船主曰此飛魚也以遠鏡視之不甚明白嗣有飛於近船者始知爲魚其飛離水不逾丈長不逾尺望之如蜻蜓蓋四翼也舟

人獲其一以藥水製之不朽隨以相贈卽而視之則前翅生於脇而較他魚爲倍長後翅稍短然他魚亦不能如此長也宜其能飛法廷議撥越南經費一千二百萬佛郎議紳議允者二百八十四人不允者一百九十九人間已撥矣因查法國國債其周年行息四釐者計二萬二千八百二十四兆零合中國銀三十一萬九千二百餘萬其周年三釐半息者計八萬八百兆零合中國銀一百一十萬萬兩計每年交息約六千萬兩蓋每年進項以五分之一交息矣 因謹按外洋各國無不有國債者法之國債每年交息至銀六千萬兩其債可謂鉅矣而民間尙肯貸之者則以政府尙信足以取信於民而民亦以按年可以得息較之他處爲穩也

或謂一千八百七十年卽同治九年法幾爲德滅矣若宗社爲墟國債將誰索乎不知萬國公法國之債貸於民還債之項出於地債與地合而爲一其地爲誰有則其債應誰償此民之所稔知也所以無慮也

二十一日晴天氣漸涼可著兩層衣矣

英美爲祕林海峽英人捕獵海龍事英廷已撥兵艦至太平洋保護云 因謹按美國近年尙霸氣未遇強有力者自以爲霸氣之可行也今英強於美顯與爲難矣美國能始終苛禁英人如待華人之例一意堅持否恐不能矣

二十二日晴夜雨天氣驟寒可著棉衣此已過赤道之故也

西人有自奉天至天津者路經各海口見大連灣銘軍新築礮臺六座堅而且精其老龍頭礮臺一座恰當敵船之衝三面臨水工程尤難和尙島東礮臺徐家山旱礮臺築土取石亦不容易此三臺之精堅尤爲各臺之最英法兵艦過此者均極口誇之 因謹按泰西各國造兵艦築礮臺講求軍械所謂安不忘危治不忘亂不戰而屈人之兵者也兵船遊歷大抵覘其國之武備以知強弱風氣如此雖欲弭兵耀德斷不能矣

二十三日

晴北風漸大船左右晃立足不穩矣

有帆船二艘自古巴赴紐約懸旂以求救援本舟見之卽停輪帆船遂派小舟至舟中三人其一上本船言自古巴開行後北風不

止已行三十二日船中糧已竭尙不知何日能到紐約故來乞糧
船主給以麪二大桶每桶二百磅薯二桶牛肉菜蔬麪包茄非足
敷一月之用然後開行 因謹按上古造舟以致遠帆櫓之力猶
限於風自輪船出海綫諸而重洋萬里可計日按時而至向之所
謂天塹者今皆爲坦途矣天地之氣運日開民生之機巧日甚易
言窮則變變則通不變則不通也又言隨時之義大矣哉言不隨
時則不可也

二十四日晴大北風船仍搖晃

同舟英商人言英法交界之海峽向來風波最大過此者無不眩
暈今擬籌費三百萬磅開通海底興造鐵路用火車往來海底以

避風浪 字林報據東洋日字新報本月初五日信云現本國政府整頓水陸兵權有蒸蒸日上之勢查現在陸軍各處城鎮礮臺以及防堵口岸均已次第建臺築壘以冀鞏固至於水師海軍暨各部臣均以爲最關緊要因經費支絀未能定議今政府因見泰西各國莫不以水師兵權多寡爲國之強弱是以不惜經費增造大小兵艦以彰國勢茲將議定添造各艦開列於下計開大鐵甲兩艘每容九千五百噸每價日洋七百萬一千六百四十六圓巡邏兵鐵甲三艘每六千噸每價四百二十一萬三千九百四十圓頭等尋常巡兵艦一艘計四千五百噸價三百三十萬一千六百四十九圓二等巡兵艦二艘每容三千五百噸每價二百四十萬

三千五百十二圓三等巡兵艦一艘計二千五百噸價一百六十
七萬一千二百四十五圓又三艘每容一千五百噸每價一百七
萬九百五十七圓頭等魚雷艇七隻每容七百五十噸每價七十
七萬三千九百四十九圓二等魚雷艇三艘每容五百噸每價五
十七萬三千七百九十圓以上統共噸位計六萬二千二百五十
噸共計日洋四千六百七十九萬七千五百十四圓 因謹按張
皇其辭者必其中有所不足也日本琉球之事知中國不快於心
近見中國海軍日強其氣自陋極憂報復乃以外強飾其中乾肺
肝如見矣

二十五日晴

日

記

卷六

午刻到紐約稅關已得外部照會卽下船坐馬車至領事衙門屬
卽寫票飯後未刻上火車廠中刻開行子刻到華盛頓此次火車
中途不停故速有泰及洋僕已在廠久候卽僱車回使館

二十六日晴

聞美國新派駐華公使布列也新報多貶之者 送外部祕魯所
產皮襪一方絲巾一盒 美國紐阿連省有寓居該地之義大利
人械鬪誤傷美人巡捕拿獲義民十餘人監禁密問而該地民人
聚衆數千竟至監所川槍轟斃七人又縊死二人其中有兩三人
尙未入美籍者義國駐美公使接義駐紐阿連領事之稟照會外
部請美廷將槍斃義人之犯按例懲辦并索賠償該省總督置之

不理外部覆文亦無懲辦賠償之意義公使又已備文照會外部請速妥辦矣

二十七日晴

金山總領事左庚丁艱由家丁稟請卸事美國民人橫殺義民一案外部覆義公使文以爲辦理此事之權操之該省合衆國官員不得越俎仍候該省自行辦理義廷見其推諉情形遂歸咎於美國政府因於二十二日遞書告辭回國只留代辦料理美外部立刻照會義代辦云義爲此役之故撤回其駐美公使美總統殊深歉仄查公使撤回之由一則因美國未嘗應允將殺死義民之兇手按例懲治二則因美國未經應允補卹死者家屬惟美國舊設

國例國家政府不能干預各省政事此案懲辦兇手之事例應歸省官辦理合衆國官員不得越俎故不能預定該省官員如何辦理此案之處亦不能預定將此案兇犯懲辦也美國政府並未言不肯補卹但須先行查明的確美國如果應給卹款然後方可照行不能急切就理云云義代辦既准外部此次照復卽電本國政府茲聞義國外部大臣業經照復許將此案再行酌議秉公辦理矣初美義兩國因此案之故幾乎決裂現在美總統與各部大臣見事有轉機可望調處不勝欣悅云 因謹按美國於中國華工一再燭逐中國照會不爲操切以前各案絕無辦兇手者其卹款不過十之一耳美國侈然自肆心輕手滑乃以用之中國者又用

之於義國大受斥辱今而後庶知公法條約之不可違乎聞諸道路美之急於轉圜者實懾於義國水師之強也義國兵艦有名担大羅杜意留義大利者其礮係一百噸爲各國兵艦所未有美自揣兵力不能敵故不敢始終妄行也此可以見海軍之不可不講矣

二十八日晴

接美外部信訂相見 英屬澳大地亞 卽新金山全洲地方向來分爲七省各省政事皆歸自理近日該省居民欲仿美國制度合成一省現在各省委員會議已議定設立一總議之所分爲上下兩院所有撥款抽稅均山下議院創議 因謹案自美總統華盛

頓創立議院而其制遂徧於天下亦古今一創局也

二十九日晴

歐洲來電云法國富商欲包攬俄國西比利亞之鐵路由赭加布士克地方至烏拉地曷士鐸埠溯太平洋共計五千三百九十八米所用之款卽以鐵路作抵特未知俄廷允否也 字林報言英國去年核算保人險一項其利甚大查英國保險公司共計八十一家資本之大小由十萬至一百萬磅不一而於去歲一年所收保險費銀共計六十八兆五百萬磅此數之多正與英國所欠民債數相似所有歷年之公積約計英金二十三兆五百萬磅尙不入此數也保險之利於此可見 因查保人險與保貨險章程相

似貨失則賠人歿亦賠顧其收數多於貨險而人之願保者須由該公司詳驗大抵病者不保老者不保期遠者不保此其所以獲利也

三十日晴

聞高麗國閔氏一黨歸心於俄高麗國王惟閔氏之言是聽高事日棘手矣 奉天將軍裕 派提督左寶貴查勘金礦以備開採倫敦來電云英國戶部自廷臣等選舉內閣高斯川爲戶部大臣後供職迄今將近三載所有通國一切經費出入細心校核撙節故凡支銷無虛糜歷來該部度支常多短絀未有盈餘自高大臣主政本年核算出入經費除開銷外尙盈英金一百三十萬磅

英廷諸巨公均以高君爲能 因謹按一國猶一家也謀國猶謀家也一家之用如以敝衣膏食爲節所節幾何不作無益害有益不貴異物賤用物而所節乃多矣通盤籌畫不爲臨事之張皇詳察弊端杜絕小人之欺飾而所節益多矣唐之劉晏庶幾近之

三月初一日 元吉晴

午初赴外部衙門謁外部各國公使先因到者墨西哥德意志土耳其其後因到者泥格拉日斯巴尼亞外部因赴總統處議辦事件尙未到署德公使有事遽回至未初外部方到墨土兩公使見後因往見謝其函致各處美公使領事照應事外部詢華人在祕魯何如因答以祕魯現在尙欲招華人來故待之尙厚其間有虐待

者乃不肖之寮東耳外部點首此外皆寒暄語因告辭外部留之
婉言曰美國新簡駐中國公使布萊爾適到衙門貴大臣願見否
因答曰可外部遂引布萊爾來見握手爲禮布萊爾云本大臣新
派駐中國公使將來務期所辦各事於兩國有益云云因答曰但
期貴大臣能將兩國有益四字存心則交涉之道得矣布萊爾又
言貴政府之意如何因答曰中國向以仁厚待人不爲與人爲難
之事我政府於交涉之事悉照公法條約無背約而行者貴大臣
可放心也此外悉詢中國道里風俗人情事遂辭出至酉初布萊
爾徒步來見言新聞紙之詆之者實有嫉妒之人爲之以美國南
北分黨北黨之人南黨好詆之且北黨之不得差者亦陰詆之新

報所言願貴大臣勿信因答曰本大臣元旦起行赴祕返美僅數日雖有所聞未敢盡信且人言何足憑要當察其行事貴大臣將來見諸行事者或與新報合或與新報不同自不可掩布萊爾乃於懷中出一紙曰此十四年美國行苛例時本大臣之條陳言不可急而當緩者此足證矣繙譯官閱之以爲信然因乃言曰貴大臣此日此言請勿忘之則於兩國有益四字符矣因作寒暄辭出又聞美廷專派公使科士達前往日國訂立報施條約日廷已優禮待之俄國京中將設一廠織綢高加索與中亞細亞各處已大興蠶事蓋出絲既多即可供杼軸云

初二日 小雨

回謁公使布萊爾談逾一刻布公使但詢京都中外相見儀注及風土人情因詳告之又見朝鮮駐美公使 倫敦來電云俄國戈林尼亞省地方與奧國毗連俄廷忽於昨日倍添駐防之兵歐洲各國聞之咸謂現在時局可虞又稱法國駐防之軍無不秣馬厲兵時加訓練每於夜間鼓聲忽鳴以試兵弁使習禦敵之法云美上議院紳益文士在議院二十五年持論平允不徇工黨今擬辭職 伯林來電德廷擬添設東邊各省防兵俄國重兵近日麇聚該地有虎視眈眈之勢故防患未形 因謹按德皇與俄皇時時爲衣冠之會情投意洽俄皇前與德皇言歡且許保歐洲昇平之局然德廷仍靜觀俄人之舉動稍有不測卽思防之不敢恃邦

交而弛武備此近日交涉之要道也

初三日晴酉刻大雨

近聞義國代辦使事參贊至美外部照會飭令譯出云爲照會事
照得花大臣請假回國會經照會辭行在案頃准貴大臣四月一
號中二月二十三日照覆本代辦將內開各節電達本國政府請
各部大臣議辦茲據本國外部來電稱意國大皇帝政府但請將
該案罪犯迅速按律究辦若未審明定罪而請懲辦未免不近情
理今義國政府復述前情再請總俟美國政府允許提犯審訊後
方可罷議至賠卹一事美國政府既言按兩國條約理所當行之
事義國政府自當記注存案等因並飭照知貴大臣爲此照會貴

大臣請煩查照可也須至照會者四月二號中二月二十四日嚴
祕理阿離押

美國駐華布公使偕其子來見 美國與巴西訂立報施條約後
德廷因恐其民向來所得於南墨洲通商之利將來爲美所奪卽
與奧國訂立通商條約爲本國商民貨產開闢銷路 因謹按泰
西之重商務各國皆然惟明者見事於未著防患於未形故英美
而外德之富強有蒸蒸日上之勢則得人之效也

初四日 陰天氣驟熱

俄京來電稱俄國兵部業已傳令所有俄兵駐守之地如有他國
人民在彼販賣貨物者卽行驅逐因恐一旦與德奧開仗此種人

爲敵鄉導也 羅馬來電稱義國外部自照會美國外部後至今未見照覆心甚著急如今日仍不照覆則令美國駐義之公使束裝返國並將現在義國駐美使署人員撤回本國所有義國使署交涉事件盡交英公使代爲辦理聞美外部布連本擬初三日下午將往紐約而不果行或者爲此之故 因按美國創苛禁華新例自光緒十四年秋毅然行之經前任使臣張蔭 及因駁詰至今毫無照覆蓋三年矣茲於義國外部之照會覆之稍遲卽大受窘挫今而後其庶知中國之仁厚乎孫武子云勇怯勢也強弱形也泰西各國以強弱分勇怯我強於人則勇我弱於人則怯萬國公法如中國之律例頭頭是道不足憑也故理足而無勢則理

不能伸勢強而無理則所爭者雖勝而爲人所嫉今地球各國其強者大抵皆恃勢而蔑理其弱者大抵皆有理而無勢惟兩強相遇則有理者可以求伸以弱遇強雖有理而無益也此謀國者之所以貴自強也

初五日晴

聞俄皇之子三月可抵上海總理各國事務衙門已有文令江海關道款待又聞二月已由香港道出上海未作句留乘船派江上駛云 初三日英公使接印度來電云曼尼布爾地方於緬甸接界有一強大部落之酋長爲其弟所逐而篡其位英國辦理該處事務大臣聞之親往調停爲叛兵所殺印度總督卽派副將格蘭

帶兵數百名進剿叛兵迎戰計數四千餘人亦持洋槍該副將以寡敵衆大挫叛兵並殲厥渠魁叛兵膽寒投降 因謹按戰陣之事兩強相遇則衆勝寡若以節制之師而遇烏合之衆則多寡非所論也此兵之所以貴練也

初六日晴

聞近日法廷所添造之兵艦現已興工尙未告竣者有頭等厚甲六艘海防鐵甲戰艦四艘鐵甲礮艇二艘鐵甲巡海兵艦三艘二等巡海兵艦四艘水雷巡船二艘洋面可用之水雷十七門頭等水雷艇二十四艘二等水雷艇二十六艘以上之厚甲戰艦可容九萬九千零二十六噸巡海兵艦可容七千零八十四噸計需經

費銀七千萬云 因謹按富強二字實相輔而行也往古之戰不過弓矢干戈其制易其費輕且無交鋒於海面者今之時局實生民以來所未有也一兵船而費數十百萬一鐵甲礮臺而費數百萬一礮而費十餘萬苟無經費何以興辦而規國者又常考究他國之礮臺堅與不堅炮之巨與不巨兵艦之大與小新與舊寡與多以定該國之強弱而後於交涉之道判厚薄分親疏別敬肆嗚呼平時未考究者安知其竅要不親歷其事又安知其用心哉
初七日晴

法國夏化埠嘉尼埠嘉尼礮廠試驗大礮其驗法則連珠而放以觀有無炸裂之弊法廷及俄國和國均派大員就觀據和國將軍

連尼文言初試之大礮一尊於四十五秒之內連放九次而無破綻隨後又試一尊比此尤大者於五十四秒之內連放七次亦無破綻因此可知法國各廠所造之大礮不在他國有名之廠之下
三月初五日新報言羅馬來電言美國外部大臣布連之照覆如至初六日猶未到卽另行議辦云云 又聞美外部大臣之公文業已交輪船寄義矣 因謹按義國政府似知美國之伎倆不示以威則游延故以決裂之情形示之而美外部乃不敢不覆既不推諉於省員亦無所俟於議院然則前此所誇耀於各邦謂美國崇尙仁義不悔鯨寡不畏強圉者至今日而掃地矣

初八日晴

美紳塞潑來函請赴紐約與宴因以金山華人方稟欲拒新簡公使布萊爾謂其憎厭華人而塞潑所請赴席係陪布萊爾事在嫌疑之際作書辭之 聞俄國西比利亞之鐵路自前年籌款興工極爲上緊近得琿春來信此項鐵路現已工竣此時當可通行查此鐵路由西比利亞接至歐洲將來由中國日本及亞洲各國前往泰西自然便捷俄人之爲此舉既不惜費又復殫精竭慮以經營之計長四千八百一十西里合中里一萬六千餘里費銀三千二百萬磅合中國銀一萬三千餘萬兩途中越過三大河皆造大橋以過從此俄國東方之金銀銅鐵各礦均可開採從前黑龍江暨乳蘇利境內向多空曠之地一片荒涼人迹不到此後轆轤銜

接直破天荒琿春地方得此易爲接應必將成爲重鎮俄人調兵轉餉呼應自靈云云 因謹按香港琿春黑龍江從前均中國之地也中國以其荒僻不甚愛惜香港以與英琿春近界爲俄所佔今則香港已成重鎮矣黑龍江之險旣爲俄有而琿春地方又得鐵路以通商俄勢漸拓於東俄之利中之害也數十年後我中國其費籌邊矣

英公使請赴跳舞會亥刻偕參贊繙譯往副總統及俄法日德東洋高麗各國使臣均到議院紳將軍亦有到者其跳舞始以男女二人對舞其轉折皆圓以後則男女合爲一隊攜手跳舞或分或合其轉折皆方子刻先回跳舞尙未已也 阿非利加之東散西

巴土王允將德人所租沿海各地免其管轄蓋德人以德銀四百萬馬克爲請王許之而棄其地也 因謹按歐洲各國方謀分裂阿洲而阿洲土酋又願以地售之是削亡如不及也然或者石卵之勢自知不敵與其被兵而割不如得價而沽則又小國窮蹙之情而不可以常理責之矣

初九日晴

土耳其公使訂於山莊見客因偕參贊繙譯申正乘車往英法俄德日國及墨洲各公使議紳到者甚多皆挈眷而至以此地距華盛頓數里有山野之景故覽勝者願遊回車已酉刻矣 美國近查華人之居加利寬尼亞省者計有七萬一千六百八十一人比

前十年之數僅稍減耳其有眷口者不過百中一二因華人由香港附搭輪船先到英屬加拿大地方潛入美境也近曾致書於英官請爲禁阻據英官覆稱華人來英屬加拿大地方照例輸納身稅則當任其往來自便地方官不能禁阻美廷因此擬於邊境認真稽拿以期禁絕華人焉 因謹按美國欲禁華人並欲鄰國幫同禁阻不知萬國公法他國內政例不得干也美人不欲華人之來英人自欲華人之來英非弱於美而求庇於美者安能強以所不欲哉

初十日 晴戌刻雷雨

智利國來電言智國港口阿利嘉之華人現因智利內亂無華官

保護已託英國副領事該領事不分畛域推愛保護華人得免於難云 因謹按此次赴祕魯遞國書道經可崙比亞國之巴拿馬省該地華人約四千餘名土人忌之於光緒十六年夏聚衆驅逐華人華人電稟當卽託美國駐該省之領事保護該領事立見該省總督斥其非理該督遂派兵彈壓得以轉危爲安因到巴拿馬時美領事及華商來迓因禮勞有加且贈以中國綢磁該領事偕因往見該督亦餽以中國之產該督欣悅且謂華人甚馴此後冀可相安又道經厄瓜多國之惠愛磯地方該地華人亦言土人妒忌至於稟請政府立令驅逐華民求於英國駐該省之領事得以駁斥不行亦能安業因一面咨總理衙門一面咨駐英出使大臣

薛福 致謝英廷并求以後永遠代爲保護焉。

十一日晴

新報謂近得俄京來電言俄廷近日布置以意度之歐洲時局難保昇平蓋以俄國近日整理軍務不遺餘力德奧兩國亦然俄國西疆各省與德奧毗連者近來俄廷不惜鉅費於該地多築鐵路四通八達以爲調兵轉運之資查四年以前俄之西疆鐵路未興調兵必須六月方到今則一月即可馳至德奧之界歐洲大局豈不危哉 因謹按俄國疆土得地球六分之一甲於各邦歐亞兩洲惟其所向其勢如常山之蛇向歐則歐危如德國奧國土耳其阿富汗波斯羅馬尼亞勃爾高利亞皆有戒心向亞則亞危如中

國朝鮮日本均宜設備俄人又鷹瞵虎視兼併爲心秣馬厲兵耀武不息以致歐亞兩洲之國均伺察俄人之動靜以定防務之緊鬆蓋欲止戈息民而不得矣

十二日晴

倫敦來電言美國駐義國公使業已於本月初九日請假三箇月出都他往云 因謹按美義交涉一事美廷以美人妄殺義人可
以不辦兇手不議賠卹方謂惟所欲爲無不如志也迨義公使一再詰問而術遂窮義公使既離美都美公使之在義者爲義所窘亦不得不離義都請假而去情形之失措如此國體傷矣自華盛頓立國以來未有如此之辱也度美廷有鑒於此外而睦鄰內而

修備則尙可以不墜前謨或竟一意徑行則強梁遇敵必蹈拿破崙之轍矣

十三日晴

日都來電言美日報施條約初九日業已成議美國所派之使臣科司達定於初十日啟行返美查科使未赴日之前先與外部大臣布連詳議立約各節因外部特欲以美廷之意告知日國部臣煙葉一項美國斷不肯免進口稅其免稅者但茶糖牛皮加非等物耳科使多才居然成約而回可謂不辱君命矣 因謹按科司達年已六十前二十年曾出使日國蓋於交涉之事三折肱矣歐墨各洲於本國之利源不輕讓人故於稅則之增減悉心籌畫默

計土產之盈虛以消息之其變改章程非苟焉而已也必有益於國計民生而後行也

十四日晴

俄廷擬在嘉山埠專製無煙火藥聞已開工云 法國新式戰艦二艘一名侯珠一名馬蘇於十年前興工今年工竣業已下水隨調赴地中海海界歐阿兩洲遊弋以壯該處水師軍容查侯珠戰艦可容一萬六百五十噸機器馬力計一萬一千三百匹駛行之速每半時辰可至十六海米又查馬蘇戰艦機器馬力計一萬一千匹試驗兩時之久每一時可行三十三海米其鐵甲近水面處皆厚十八英寸船上旋轉礮臺之甲厚十四英寸船身之甲在機

器房與火藥房者均厚三英寸馬蘇戰艦有三十四山地米打一
山地米打合英寸十分之四大礮四尊近可洞穿二尺九寸之熟
鐵板又有十四山地米打大礮十七尊旋轉連珠速放礮二十尊
侯珠戰艦之礮位與馬蘇戰艦之礮位其數相同惟三十四山地
米打之大礮祇有兩尊另有二十七山地米大礮兩尊 因謹按
今日大勢一關力關巧之時也地球各國均以槍礮戰艦相誇耀
竭智殫財以求勝人覘國者卽於此卜強弱焉自有無煙火藥而
火藥爲之一變自有鋼甲康邦鐵甲而鐵甲爲之一新進益求進
精益求精初未聞有一建言者謂舊章不可易而新法不可行也
弓矢之利變而爲槍礮十人之矢不敵一人之槍也槍斃人於二

里之外矢傷人於百步之內矢未及到而挾矢者先亡矣鐵艦戰勝於大海之中隨意所向凡海口無不可攻防之於陸則防不勝防矣古之善談兵者皆曰兵機機者隨時而應變者也不能隨時而應變安可與談兵哉俄法今日所行者亦不過隨時應變而已十五日 晴夜微雨

回謁英公使日本公使土耳其公使 法廷近日派員將所有之水雷艇一一查驗查得水師提督奧布所造之五十艘均不適用已嚴行根究分別治罪云 因謹按賞罰者激勸之權也兵家尤重之賞之使勸罰之使懲有所勸而果於立功有所懲而不敢飲法矣中國之購造槍礮以前不適用者多矣未聞有所嚴懲也宜

其玩也

十六日 晴未刻微雨卽止

酉刻接天津大學士李鴻 來電云田貝如不能留從前來華之
提督衛禮森和平公正能改派否鴻諫 日內美國兵部與水師
部各員留心考究無煙火藥爲水陸各軍槍礮之需因歐洲各國
現於此事均竭力講求故美國亦不肯讓人間已覓得一種較歐
洲所製者性尤烈然之無煙無灰燼無臭味無瘀塞以礙槍管但
不知能久藏不壞否仍俟再行考究 戌刻又接天津大學士李
鴻 來電云布萊爾前在議院詆辱華工過甚主持立法苛禁詳
載新聞紙美廷向敦陸誼未便派令使華照西例公法中國亦未

便接待已商總署請速告外部另易安人爲要鴻諫當卽照會美
外部訂期相晤 德國郵政與電報各局去年進款甚旺有德銀
一萬萬四千六百六十六萬五千一百八十馬克合英銀有九百
三十萬磅較前年約多六百六十萬馬克云 因謹按德國之土
地人民抵中國十之一耳而郵政電報入款至銀四千餘萬兩中
國仿而行之卽不能倍當亦不至多讓亦籌經費之一端矣或謂
郵政行而貧民失業則不知實在情形也嘗考美國紐約一處郵
政局用人至二千名然則風氣開而音問流通設局多而需人亦
衆非特不奪小民之業且有益於其謀生也可於親歷者決之也

十七日晴

照會美外部布連訂見商辦公事 德國來電云德國陸軍統領

將軍毛奇特昨日逝世年九十歲查該將軍於前一千八百六十六年德奧構兵將軍與戰五十日而奧敗割地求和一千八百七十年德法爭雄血戰年餘虜法君入法都割法土地法國以銀七萬萬兩求和蓋地球各國名將無可比方者 因謹按法奧皆歐

洲大國而法適值拿破崙當國時尤爲桀驁至欲分裂布魯士使之自弱限制以二十年內不許增兵在他國處之必一籌莫展坐待滅亡矣該將軍毛奇特乃與相臣畢思麻創爲更番練兵之法兵不增額而實通國皆兵不二十年卒以滅法而報仇雪恥遂霸歐洲居恒常論美之華盛頓合堯舜湯武爲一人也德之畢思麻

合周公太公爲一人也將軍毛奇特合張良趙充國爲一人也德以威稜第二爲君以畢思麻爲相以毛奇特爲將軍而皆享大壽威稜第二年過九旬毛奇特年亦九旬畢思麻已近八十矣過此以往卽以畢思麻之存歿卜德意志之安危而定歐洲之大局賢才關乎世運天之生才不偶也君之用才貴專也 戊刻總理各國事務衙門來電卜雷耳詆毀中國究竟有無實據或有人覬覦此差故造蜚語亦未可定希探詢明確先電後再酌勿遽告外部 霰 亥刻總理各國事務衙門又來電美派卜雷耳駐華此人於光緒壬午戊子間在議院痛詆中國載在新報若來華恐於邦交有礙希援美例酌商外部阻止並電覆霰

十八日晴

美外部覆文訂午刻相見於外部衙門因偕繙譯屆時而往外部已到署卽請見因略作寒暄卽告以新派駐華公使布萊爾中國總理衙門及北洋大臣均有電到言布使前於壬午戊子年間詆毀華人今以該員駐華似非所以厚邦交示親睦外部答曰布萊爾人品甚優美廷之派此人者正以其能篤邦交也人言殊不足信因曰人言不足信布使所言不可掩布使前此所以詆華人者其言已布之新聞則其嫉華人可知彼嫉華人何必駐華且金山華商已控之矣將來慮不能容中國自有不接待之權願審慎外部曰中國既不願美國何必相強但總統已出巡西省當以此意

聞諸總統俟總統定奪可耳因詢其日期外部答曰總統返駕約
不過二十日爾時當可決斷因遂辭出倫敦來電云近日葡國
屬民在阿非利加洲之拜拉港口強奪英國商船數艘英外部業
經照會英國駐葡公使向葡廷責問其啟釁之由如覆詞遁飾則
必索賠云俄京來電云祕林海峽捕海龍一案關涉俄國至重
緣該海四岸半歸俄轄半歸美轄聞俄廷亦欲會同英美兩國請
局外之國將此案秉公判斷如請瑞典國王或瑞士總統俄廷情
願聽斷云因謹按自通商之局創而交涉之事遂多強與強尙
可相持不敢輕發如英美祕林海峽之案是也強與弱無待審慎
慷慨而言如英葡此案是也案情甫出而傍觀已可決其歸宿者

不專論理之曲直要必以兩國之勢參之則瞭然矣

十九日晴

英報言俄人在西比利亞興鐵路於軍務商務均有益該鐵路所過地方有膏腴之地數百萬畝又有五金之礦其天氣與法國相同將來必變爲繁庶之區且此條鐵路成後海參崴卽成爲俄國屯水師之地如調兵至中國邊界不過數日路程云 因謹按俄人日夜經營於中國毗連地方興造鐵路旁觀者皆已爲中國憂因前見美格總統之夫人夫人爲因言俄人之地勢已包中國東西北界鐵路若成必爲中國之患防之之法非自造鐵路不可其意殷拳因已書之座右矣今又有所聞因憶前言而復論之

二十日晴

越南東京所轄附近黑河之自謀地方於光緒十六年十二月底有土人五百名不服法員法員參政率所招土兵攻之不勝參政被殺法軍二頭領亦被殺 因謹按法人佔越南以爲得計自李埃利戰歿以來法員之傷斃者衆矣可爲佳兵者戒 初八日美商輪船由香港回金山所運回生絲值銀一百萬圓皆購自中國者 俄國苛禁猶太人英京紳商擬謁俄廷代爲勸免又擬公舉牧師二人赴俄調停嗣接俄國駐英公使文稱俄廷已諭不肯接見紳商不得已遂作一書寄至俄廷力爲懇請乃俄皇於此書並不折閱原封寄回云 因謹按猶太教人與俄之亂黨謀逆俄所

當驅者也美英兩國爲之緩頰以博仁厚之名乃英人於新金山加拿大諸處苛禁華人之入境者至每人納身稅百圓或五十圓美國則於華人并禁其不准入境是甘以殘刻自處而以仁厚責人此所謂藏身不恕而求喻諸人者也施之小國雖不願從或尙不敢奚落俄較英美爲強矣原函遞回其見輕也非由自取哉

二十一日晴

英屬新金山礦產極旺者據家謂自咸豐元年起至今三十六年計出金三百二十九兆磅以每磅值銀四兩計之合銀十三萬一千六百萬兩銀三兆磅鐵值銀十八兆磅煤值銀二十四兆磅煉蠟石值銀一兆磅可謂多矣 因謹按新金山者英之一外府也

英之本國只倫敦蘇格蘭阿爾蘭三島抵中國一大省之地耳本國無可開拓故以海船通至各洲覓無主之地以興利而移民英之屬地歐墨阿三洲蓋無所不有矣而并得新金山一島於南洋又在三洲之外其地礦產極饒故稱金山其稱新金山者別乎美國之金山而言也其實美之金山美人名爲三夫蘭昔司科英之新金山英人名爲澳大利亞也英以島爲國屬地畸零偏於各洲故恃兵船以禦攝之否則聲氣不能通威稜不能及已創其利而他人享其成矣然則英之水師甲於地球亦勢不得已也 律師科司達來會言布萊爾於光緒十四年以前尙不惡華人自美總統與外部行苛例之時而後改轍以趨時政府所言壬午年已詆

日
辱華工誤也

二十二日晴

金山華人自分黨戕殺傷及美國之人各堂號已被美國巡捕毀折茲接金山報知本月十六日洋差在街拿護遊手華人十七名或令當苦工或予監禁其有竄往他處者亦行文他處一律飭拿匪類歛迹善良可相安矣 謁律師科司達據云此次自歐洲回歐洲如英法日國之言時事者皆以俄人叵測加意防之又謂中國與俄爲鄰最爲吃緊不可不防防之道當由直隸興造鐵路達於滿洲再達於蒙古將來調兵轉餉方能靈捷如措置得法俄人自消覬覦之心可以不戰而屈之否則十年之內邊患必生矣

二十三日晴

廚房徹夜不息爐是日置鎖準於酉刻鎖門 聞日本國人五十
三名附船至金山稅關不准上岸而載回者甚多 英屬域多利
來電該處土人忌華人之攬工已稟政府請抽華人身稅每人一
百圓未經批准該土人又具稟固請云 埃及國小無政日漸貧
弱前此英人慮其爲俄所併派員爲之經理國中有地約一百六
十萬方里向爲沃土後被海水浸潤已變爲磽招人耕種無敢受
者英人爲之引河水設溝渠經畫三年依然變磽爲沃每畝可收
租錢二兩六錢焉 因謹按人力之勤可以轉移地利李悝所著
盡地力者行之成效昭然矣中國奉天一省荒土最多前此屢議

墾荒究以民不安業事成畫餅近日當路方謀開礦產興鐵路竊謂此二事者可與墾荒相輔而行以鐵路便民之來往以開礦通市之有無以至荒足民之衣食三者並舉而奉天一省必變繁庶之區外可以與俄內可以富國矣

二十四日晴 夜大雨

光緒十六年中國戶部查常年入款按年計之各省海關洋稅銀一千五百萬兩兩地丁銀一千餘萬兩鹽課銀一千二百餘萬兩常關稅銀二百餘萬兩釐金銀一千三百餘萬兩茶稅當稅鹽商捐輸銀三百五十餘萬兩雜稅銀一千五百餘萬兩裁撤長夫等項銀五十三萬餘兩十六年一年共計八千數百萬兩 因謹

接以中國版圖之廣民庶之繁而每年入款止銀八千餘萬兩可謂輕徭薄賦矣而民不免於貧者何也則以商務不興稅則未善外交失權而銀錢一項一耗於盤剝再耗於漏卮故也

二十五日晴

法京來電云前德法交兵法敗割阿沙司羅連之地以求和德廷設立章程凡法人入該境者均須護照方准來往茲附近德界之法人以爲不便屢請德廷改章不許近日該地賽會法人見來往阻滯又請德廷從寬改訂護照章程德廷謂當此時勢不得不嚴仍不許焉 英美爲祕林海峽捕海龍事爭執未已現俄國又飭駐防該海峽之員認真看守俄屬各島不知何意似與英爲難矣

因謹按自通商之局啟而齟齬之事無日無之亦無國無之其強者應付從容可靜以待其定也亦無憂不得其平也其非強者則先事必受呵喝之言和事必有軒輊之迹柔則茹之剛則吐之交涉如斯而已

二十六日晴

昨日義國駐美代辦接到義國外部來函言美國政府既不允義國所請辦兇賠卹徒以文牘往還辨論殊屬無益不如絕交之爲愈以後該代辦祇准料理使署本國事件不與美國外部辦理交涉事務云云查義與美兩國交誼如此割席將來美國駐義之公使料難久留義都也 因按地球各國美與英可謂極富而美實

不如英之強也且不僅不如英法俄德等國并不如義奧之強也徒以與諸強國不共一洲而與同洲者皆小國美於是得爲墨洲之大國足以自雄矣而開創之君華盛頓又爲間出之英雄當日與英相持而英人不能勝百餘年來遂無敢肆志於美者美之君臣亦守華盛頓之規模而兢兢以仁義爲念此其所以立國不搖也今則非昔比矣其君臣有夜郎自大之意其議院有俯視一切之心其南北兩黨有莫能相下相爲敵讎之怨外交則睥睨一切內治則畛域自私揣美之大勢三十年內不有外侮必有內憂外侮則受挫於強梁內憂則興戎於兩黨西班牙土耳其卽其前轍也此治亂循環之機也

二十七日 晴天氣轉寒

美紳加拿塞潑來見談及近年歐洲各國專力於阿非利加一洲
拓地阿洲土人無以禦之遂至瓜分約略計之法國得二百餘萬
英方里英國得一百六十二萬英方里德國得一百餘萬英方里
孔國得一百萬英方里義大利得三十六萬英方里西班牙得二
十餘萬英方里葡萄牙得十六萬英方里合而計之較中國十八
省之地約三倍之已歸各國分裂矣土人所存僅二百五十萬英
方里 英廷特遣使臣崑吞由印度馳往緬甸中途連隨員人等
均遭土人殺戮一節今接續電知此事實係的確故目下印總督
已飭令軍士由印度起程迅速趨行以緝兇手不使遠逃 因謹

按法之佔越南英之佔緬甸土人不服相與爲難英法之損傷弁兵非一次矣而不聞棄其地者歐洲各國之視土地爲至重也以爲霸氣可也以爲堅忍亦可也

二十八日晴

巴西國以地廣人稀故招人開墾而不取值茲有一公司集股洋二千五百萬圓將於巴西公地立十二開墾埠頭其中並造鐵路以相聯絡設市以便交易並興機巧設製造工作開礦產諸務其開墾之人擬招五千有眷屬者可挈眷而往各給以農器並住屋路費由公司經理公司股本之利共三之一由巴西國家保以五釐歐洲人大半附股其中云 俄國來電云英美兩國政府於祕

林海峽捕獵海龍一案向不商及俄廷膜置俄國視爲局外俄廷殊抱不平英美兩國以後所議捕獵海龍章程俄廷作爲廢紙因謹按祕林海峽之旁俄既有屬地則傍俄地之海面俄廷自應與聞則俄人所言自名正言順也雖然當今之世如英美所行於祕林海峽之事者多矣且過於此者亦不勝數矣如法人佔突尼斯德人佔太平洋之島俄人且廢勃而加釐亞之君阿非利加一洲歐洲各國直分裂之矣弱之肉強之食有天命者任自爲弱者不敢言言之亦無濟也俄人強故敢言且言之而勢又足以濟之度英美兩國必不能不留俄之地步矣

二十九日 晴天氣驟寒如二月時

美紳塞潑來見訪以時事言俄國於光緒十五年開西域鐵路因係初創當年擬虧本銀十餘萬兩不意次年計算不但無虧且有利銀二萬八千兩出入貨物比前已加倍徙去年以新開鐵路一條不足敷用客貨之車亦嫌少因擬兩路並行遂籌欸一千萬圓爲已開鐵路添築道路增造車輛搭蓋房屋之用另籌四百萬圓爲將開未開之用土耳其國聞之亦籌辦鐵路開礦矣 因謹按地球屬地之多以英俄兩國爲最英之本國祇三島故闢地於他洲俄之本國多毗連故拓地於鄰國其期長駕而遠馭俄期遠交而近攻其地既廣均有鞭長莫及之虞英不得不講求水師俄不得不興辦鐵路其勢然也之二者以調軍餉既能迅速以遞消息

尤覺靈通既可以保已定之局又可以擴未闢之疆當漢之時武帝於西域欲通而不能今則欲阻而不得事勢每出於所料之外所望謀國者勿膠成見而滯於古法也